

PROCEDIMENTO PARA A XUBILACIÓN DO PERSOAL DOCENTE E INVESTIGADOR PERTENCENTE AOS CORPOS DOCENTES UNIVERSITARIOS DA UNIVERSIDADE DE VIGO (CG 28/07/2022)

A disposición adicional décimo quinta, 5, da Lei 30/1984, de 2 de agosto, de Medidas para a Reforma da Función Pública, modificada pola Lei 23/1988, de 28 de xullo, na redacción dada polo artigo único da Lei 27/1994, de 29 de setembro, establece os setenta anos como a idade para a xubilación forzosa dos funcionarios dos corpos docentes universitarios e establece a posibilidade de que estes poidan xubilarse unha vez cumpran os sesenta e cinco anos, sempre e cando o solicitaran na forma e prazos que se establezan regulamentariamente, sen prexuízo dos demais supostos de xubilación voluntaria legalmente previstos.

O Real Decreto 1859/1995, de 17 de novembro, polo que se determinan a forma e prazos para a solicitude de xubilación dos funcionarios dos corpos docentes universitarios e a contratación de xubilados dos ditos corpos como profesorado emérito, regula que aqueles funcionarios dos corpos docentes universitarios que soliciten a xubilación unha vez que cumpran os sesenta e cinco anos de idade, deberán dirixir a solicitude ao reitor/a da Universidade á que pertencen e a dita solicitude formalizarase tres meses antes de que cumpran os sesenta e cinco ou seguintes anos ata os sesenta e nove incluídos, e farase efectiva ao fin do curso académico correspondente.

Por outro lado, no Real Decreto Lexislativo 670/1987, de 30 de abril, polo que se aproba o texto refundido da Lei de Clases Pasivas, no artigo 28.2.b) establece que a xubilación de carácter voluntario, poderá solicitarse cando a persoa interesada cumpra os sesenta anos de idade e teña recoñecidos trinta anos de servizos efectivos.

Co obxecto de definir os criterios a seguir en canto ás solicitudes e datas de efectos de xubilación do profesorado docente e investigador funcionario da Universidade de Vigo e en aplicación das normas anteriores, ditase o seguinte

PROCEDIMENTO

Primeira.- A xubilación do persoal funcionario pertencente aos corpos docentes universitarios da Universidade de Vigo producirase segundo dúas modalidades: forzosa e voluntaria.

- 1) Xubilación Forzosa: Os funcionarios pertencentes aos corpos docentes universitarios xubilaranse forzosamente cando cumpran os setenta anos de idade, podendo optar por xubilarse na data de cumprimento da idade ou á finalización do curso académico.
- 2) Xubilación Voluntaria: Os funcionarios pertencentes aos corpos docentes universitarios poderán solicitar a xubilación voluntaria sempre que cumpran algún dos seguintes requisitos:
 - a) Ter cumpridos sesenta anos de idade e ter recoñecidos trinta anos de servizos efectivos. Neste suposto, a data de efectos será a que indique o/a interesado/a na súa solicitude, podendo optar por xubilarse na data de cumprimento da idade ou á finalización do curso académico.

- b) Ter cumpridos sesenta e cinco anos de idade e sucesivos ata os sesenta e nove anos e ter quince anos de servizos prestados. Neste caso a data de efectos deberá ser na data fin do curso académico.

Segunda.- A data de referencia de finalización do curso académico será o 31 de agosto de cada ano.

Terceira.- O procedemento de xubilación iniciárase a solicitude da persoa funcionaria interesada mediante o modelo de solicitude correspondente e enviarase ao Servizo competente en materia de persoal docente e investigador, dirixida ao reitor da Universidade de Vigo, cunha antelación mínima de tres meses á data de xubilación.

Cuarta.- Este procedemento non afectará ao PDI funcionario que estea incluído no Réxime Xeral da Seguridade Social.